



O Chuuinus in Bergensi monasterio non procul Magdenburgo monachum egit, atq; diligenti librorum lectione in uirum eruditum euasit. Vnde eius loci abbas à fratribus electus est. Cū autem ibi optimè præsideret, atq; interim Diethardus præsul Hildesheimensis mortuus esset, ipse ex monasterio ad Episcopatum uocatus fuit. Huic uocationi ipse obediens magna diligentia ecclesiam eam administrauit, atq; eius loci Canonicos suo exemplo in officio continuit. Cum autem illi frugalem uitã ducerent, nec dum tot opibus abundarent, ipse redditibus suis supputatis, Canonicis per sedecim dies festos in anno uinum dari iussit,

ut in rebus diuinis obeundis eò alacriores essent. Postea sese Romam contulit, ut cum pontifice de quibusdam rebus conferret. rediens secum S. Epiphaniij corpus (quod hætenus Ticini quieuerat) attulit, atq; multo auro ornatũ in suo templo collocauit. Hoc modo summa pietate & eruditione instructus Hildesheimensem Ecclesiam per triginta annos administrauit. Cum autem iterum de quibusdam rebus ambigeret, atq; ideò denuò Romam contendere, ne error aliquis inualesceret, in itinere obiit, anno noningentesimo octuagesimo sexto. Crantz. Anon.